

商水縣志卷二十四

雜事志

祥異

漢

宣帝時有鳳止於城內十字街因名鳳凰臺

元

延祐三年十月壬午地震

明

永樂十三年饑

正統五年饑

天順四年大水

成化二十年饑

商水縣志

卷二十四 雜事志

弘治元年秋大水

四年大有年

正德六年大疫

嘉靖三年春正月黑風晝晦六月旱八月癸卯地震如雷

十二年冬十月辛巳星隕如雨

萬曆五年彗星晝見

十五年三月壬辰地震

二十一年四月初旬霖雨抵八月方止四野瀰漫室廬頽圮夏麥

飄沒秋種不得播百姓嗷嗷始食魚鰕繼餐樹皮草根後乃同

類相食餓殍滿溝壑白骨枕籍原野誠人間未有之災也上發

內帑銀三萬兩賑濟民賴全活

二十六年大饑

三十二年霪雨暴降麥禾傷甚

四十四年彗星見大旱自五月至七月初二日始雨
天啟二年麥秀兩岐穀多三穗是年大有

七年二月雨冰野禽羽凍民競取之

崇禎四年夏四月太白經天

五年夏五月霪雨至八月止河水泛溢舟航遍地廬舍傾頽壓死
男女無數民始饑

六年沙雞來其形似鳩短腳貓蹠不能樹栖夜好羣飛飛則有聲
民間爭以火照取而食之識者卜爲羣盜蜂起之象是年流寇
起

十年蝗

十一年蝗

商水縣志

卷二十四

雜事志

二

十二年春大旱蝗

十三年大饑人相食冬大雪路絕行人城門堅閉四關皆食人之
藪也

十四年春大疫抵秋方止死者無數初猶棺殮繼用箔捲後則闔
門皆死竟無一人能殮者至六月間街少人跡但聞蠅聲薨薨
而已

清

順治三年正月雨雪震電

八年春地震

九年二月十五日地震

十年大有年

十四年沙河決秋禾盡被淹沒

十五年夏五月沙河決橫流肆虐二麥飄沒民結桴水中掇其穗而食之至秋霖雨連綿舊口復決四野瀰漫濁浪排空環城圍繞非舟楫莫能往來

十六年夏沙河決麥秋湮沒九月二十一日午時天鼓鳴於東南康熙元年八月黃河水溢汎濫於南與沙河堤平西華河決葫蘆灣縣境河決楊家灣二水橫流漂民廬舍不可勝數城不沒者三版河水之決無大於此者是年八月三十日午刻地震如雷鳴

二年大旱

三年大有年

四年沙河復決楊家灣

六年秋大旱飛蝗蔽天

商水縣志

卷二十四

雜事志

三

七年三月二十八日白氣見於西南彗長數十丈經十餘日不散六月太白晝見十七日戌時地震房屋搖動如將塌狀大雨數日不止平地水深丈餘楊灣河堤復決

十年大有年

十一年大水

十二年大水

十三年春大饑百姓食草根樹皮賣子女者甚多

十五年大水

十六年大水

十七年春大饑撫憲董繪圖上之上發內帑並移他縣廩穀差戶部侍郎查庫逐戶賑濟民得免於死是年自春徂秋霖雨不止二麥灰飛秋稼盡荒歲復大饑上蠲免是年田租之半

十八年三月二十七日天雨雹大者如拳小者如卵由白沙岡北
蔡寺抵上蔡東岸集東南西北亘百餘里屋瓦擊碎二麥盡毀
如泥無一莖存者九月十一日沙河水決是歲復大饑

十九年大有年

二十年十二月十八日夜雷電大作雨雪連綿百餘日歲大饑

二十一年沙河許家灣堤決

二十二年復決漂沒幾千家知縣郭天錦詳令西華協夫修築至
今永固是年十二月二十三日夜雨雪雷電交加至次早微有
聲

二十三年正月初七日大風晝晦雷聲震耳

二十五年大有年上免田租之半

二十八年大旱蝗野無青草民食樹皮草根漸次逃散十一月瘟

商水縣志

卷二十四

雜事志

四

氣傳染自北而南牛驢死者百不存一至次年十月始息耕地
乏牛多有以人曳耒耜者

二十九年十一月雨雪寒沍冰堅至次年二月始解計六十餘日
人畜果木凍死無數

三十年上免田租一年

三十一年陝西饑協運湖廣江南漕糶於潼關盤剝車價斗米一
金甚至輪折牛斃夫役死亡貽累不堪

三十二年二月黃霧塞蔽天日二十九日夜半起至次日巳時開
繼以暴風屋瓦皆飛

四十二年夏大雨十晝夜淹塌民居不可勝數平地水深一丈遍
地舟航田禾無復一莖矣

四十三年春大饑

四十四年大有年

四十八年四月大雨旬日平地水深數尺更加白帝河決二麥盡被淹沒

四十九年春大饑草根樹皮搜括殆盡民間競鬻子女一兒值百錢或以二升雜糧易之甚至不忍分離居家有赴河死者

五十年大有年

五十三年麥秀兩岐

五十六年趙老人集河決西北一帶秋禾盡被淹沒是年春三月

天鼓鳴於西北八月宜陽民亢挺作亂尋討平之

五十九年大有年

六十一年大有年上免田租一年

雍正元年六月黃河橋口決十月至邑沙河以北莊村被其衝漂

商水縣志

卷二十四

雜事志

五

者十之六七淹死居民不可勝數

二年大有年

三年大熟

六年大熟

七年沙河決王家埠口

八年沙河決白帝舊志作五年誤

八年春三月鎮倉廟忽來白鳥一對時時飛鳴廟前池上市中男婦皆往觀之留數日飛去舊志在拾遺今移此

乾隆元年黃河水溢至沙河北東西馬坡春三月監生魏承統樓上產白鳥鴉一隻綠嘴綠足四方往觀者其眾皆以為瑞舊志在拾遺今移此

二年大有年

三年大有年

四年大水

五年大有年

六年四月大雨連日窪地二麥悉被漂沒

七年大水霖雨數月麥秋俱無

八年春大饑民多鬻子女者奉憲文安插飭令回贖不致離散上

聞詔發倉穀賑之復緩其征比民始得甦麥秋豐登參項城縣志以上舊

志

九年大有年糧價賤至每斗銀四五分

十一年大水

十二年上免田租一年

四十七年黃河決楊橋口由朱仙鎮西華至周家口穿潁直趨澉

商水縣志

卷二十四 雜事志

六

河平地水深數尺

五十一年大饑人相食

嘉慶十八年歲大饑春夏亢旱六月始雨蕎麥遍野八月隕霜民

不聊生

道光十六年五月二十七日飛蝗至六月蝻生食禾殆盡

十七年春大饑人相食

二十年六月大風洋溝河地方許樓村正當其衝房樹折損無算

壓死居民十數人受傷者甚多知縣潘公往驗賑濟

二十五年黃河決口水至沙河北岸按項志二十一年黃河決開封入潁水二十三年黃河復

決入潁疑有錯訛

咸豐元年虹見北方

四年大熟

八年八月初八日午刻大雨如注雷電交作平地水深數尺雨後田間多巨魚徐村桃園地陷如潭

十一年五月彗星出西北口大如拳尾射東南長竟天

同治三年正月初八日雷聲發

四年正月十三日迅雷

六年蝗生

九年六月大燠人多渴死

十一年七月十五日月華

十二年五月朔日食既晝暝恒星見

光緒三年大饑斗米千錢餓殍載道西北一帶避荒鬻婦女者無數二月初六日黑風從西北起屋瓦皆震五月大疫六月蝗食禾幾遍

商水縣志

卷二十四

雜事志

七

四年三月十六日天雨冰麥秋豐收

五年麥大熟七月十五日月華

六年二月初六日戌刻空中有火光大如斗流入西南人畜多災

八年五月彗星見

九年二月二十二日戌時空中有火光大如斗八月彗星見十一月彗星在天河側戌初出

十年十月二十二二十三日星移如織光芒數尺十一月彗星見十一年春大雨麥生紅蟲歲大饑三月二十八日日生六環闇淡無光五月二十四日白氣見西方長竟天十二月二十五日日戴三冠

十二年五月二十日有黑氣長竟天

十三年八月十六日黃河決鄭州水至沙河北岸淹沒廬舍無算

冬旱牛病瘟死者甚多

十四年霖雨麥生紅蟲春邑南關任姓宅有狐作人語百方遣之不去至五月聲遂寂

十五年正月朔有白氣三五天中蝗蝻生

十六年四月初一日烈風廬舍樹木毀折無算周家口寨南禹王宮殿前牌坊竟被吹倒屋瓦羣飛瓦石皆走

十八年五月飛蝗蔽天邑治西南尤多民夫捕之不爲災

二十年大雨麥被淹沒者無算冬燐火遍野

二十一年自五月至七月雨不止秋大疫十人九瘡

二十二年大水

二十三年大饑五月十三日地震夏秋霖雨窪地盡爲澤國冬澇陽民變城中避亂者甚衆

商水縣志

卷二十四

雜事志

八

二十四年大饑邑貧民糾黨借糧各集鎮罷市五月大雨經旬卑下之地麥禾盡傷城四門非舟楫不能入歲大疫死者無算

二十五年春大疫民不聊生知縣孫多祺設粥廠於東關全活者甚衆秋冬有黃雲搏月下如槍狀十一月初八日紅雲自西南來天日無色

二十六年正月十六日日中有黑子七月熒惑入南斗太后與景帝西狩

二十七年正月十九日大風霾二月十四日黑紅黃三色竟日晝晦折屋無數二十二日夜白氣長竟天六月二十日大風雨十二月二十八日夜有火光南流如晝天鼓鳴

二十八年正月朔至初五日日出高丈餘有二日纒繞已刻始沒六月二十一日地震十月十六日午後有聲如雷

三十一年三月二十七日申時天雨雹大如拳小如卵由白沙崗經扶蘇寺地方抵洋溝河南至蔡境寬七八里二麥盡爲損壞三十三年春大饑斗米錢二緡周家口貧民聚衆借糧勢將搶奪四方糧米不敢來市人情洶洶亂象將成有元豐富商顧某運白米數千石稟官平糶全活無算地方亦安七月彗星見

三十四年六月熒惑入南斗十月初三日紅光四射

宣統元年五月十三日暴雨如注十餘日平地水深數尺秋禾多傷七月十二日卯時南方虹見秋陰雨連綿低地麥至十一二月始布種

二年四月蝗食麥五月彗星數見於東北西南長丈餘旬日不散秋八月二十二日沙河由白帝決口村房盡被淹沒

三年春大饑六月七月太白經天熒惑入南斗

商水縣志

卷二十四 雜事志

九

民國元年夏秋大旱

二年歲大旱五月初十日天雨雹

三年四月十一日戌時天雨雹蟲食麥禾

五年正月初二日地震三月十五日月華

六年正月初二日六月十三日地震是年瘟疫煩盛人畜死者相枕藉春大旱多風麥秀雙歧間有一莖三四穗者

兵變

漢

王莽末羣賊入汝陽城郡主簿周嘉從太守何敞討賊敞爲流矢中郡兵奔北賊圍繞數十重白刃交集嘉乃擗敞以身捍之因呵賊曰卿曹皆人隸也豈有還害其君者耶嘉請以死贖君命因仰天號泣羣賊於是兩兩相視曰此義士也給其車馬遣送

之見後漢書
周嘉傳

唐

元和十二年淮西兵寇澠水鎮殺三將焚芻粟而去

中和三年黃巢攻陳州悉衆屯澠水旣而感化帥時溥赴援亦軍

於澠水

上一條見讀
史方輿紀要

明

正德六年適流賊劉六劉七餘黨趙燧邢老虎將衆薄城時雉壘
卑削知縣劉漢雅意愛民禮文學之士義激士民百方固守越
二日賊從北門入漢與家人皆自經未卽死賊感其義釋而禮
之倉庫無失事聞嘉獎

崇禎七年流賊渡河八月至商水北蔡寺地方殺人甚衆

九年流賊至商水周家口趙老人集殺擄無數

商水縣志

卷二十四

雜事志

十

十三年大饑羣盜蜂起一條龍袁老山小袁營千金劉皆統衆數
十萬到處焚殺百姓壯者皆從賊去其餘老弱相食甚有父子
兄弟夫婦自相啖者

十四年十月初四日夜闖賊自項抵商欲襲城守者覺之而去初
五日遂設攻具薄城知縣姚文衡教諭王應登督領鄉官張質
等國學生傅嘉言高思忠等與鄉民百方固守城上立雲樓以
砲擊之城下率義勇時砍其營凡三晝夜賊勢益盛攻打益急
矢石俱盡救援無恃力弗支也初七日早賊以砲擊破東門甕
城衆始喪氣文衡投井死應登自縊質與嘉言思忠皆被執不
屈死生員李之萼及鄉民死義者甚衆殺死男女數萬屍骸枕

藉舊志
作集血流成渠

清

順治二年豫王南征四月二十四日固山土將兵至沙河南岸黃家灘扎營僞官王仁宇逃去先是崇禎十四年闖賊李自成亂後遍地綠林揭竿嘯衆割據稱雄商民不覩天日者凡六年至此始隸王籍

咸豐三年捻匪由周家口至繞城而南

八年十月二十七日捻匪焚掠周家口火光照耀十餘里暮夜能辨道途遺物

九年二月二十八日捻匪夾城而過三月鄉團與戰於連橋坡敗績死傷無算八月十五日復至城下旋向西去

同治元年捻匪擾害扶蘇寺寨居民憾之因誤殺官兵五人知縣聯魁以叛逆稟良民被戮者八十餘口將屠全寨知府劉拱宸力請始免

商水縣志

卷二十四

雜事志

十一

二年捻匪圍趙集寨歲貢李如璧廩生王貫設法嚴守晝夜不解賊無所得遂解圍去八月三十日賊攻北蔡寺寨破之詰朝破北岳寨夕復破龍塘河寨焚掠甚慘殺人無算男女殉難盡節者數百人事聞於上旌卹入祠

三年捻匪至東西馬地方飽掠而去賊後至者數人居民擒而殺之先是賊侵遵道寨時有鹽販數十人路經其地賴以堵防後又侵利和寨

民國元年十一月初五日土匪擾北蔡寺地方知縣曾紀烜擊賊於魏家樓中炮死與難者團兵二人差役六人

二年盜賊蠶起富戶大商時被搶劫

三年知縣徐家璘擒斃賊匪無算

補遺

人物志

孝友

李景和字時煦與胞兄景泰友愛極篤胞兄年六十五和六十三胞兄病甚和日侍其側親爲煎藥大有李勣焚鬚之致胞兄意不適每呵責之和含笑而受益加恭謹退語家人曰吾與吾兄均老矣呵責之聲恐難久聞言已嗚咽及兄故常率家人春秋祭墓無少間阻壽七十七無疾而終過胞兄次子鑑爲嗣

王殿魁與弟應魁黃冲連莊人幼極貧無資養親出爲人作佃親賴以養殿魁娶許氏生子學禮成一家焉嗣後雙親逝世殿魁應魁竭力營葬兄弟相處如親在時家道漸小康守農人本色鄰人無閒言殿魁年七十五應魁年七十二一日俱病各臥室

商水縣志

卷二十四

一

中殿魁召其子學禮曰吾與汝叔壽將終汝急事汝叔應魁召其姪學禮曰吾與汝父數將盡汝速事汝父殿魁又曰吾先吾弟應魁亦曰吾隨吾兄是年七月二十八日殿魁故二十九日應魁故偕手同歸各如所言兄弟敦睦始終一致聞者樂稱道之

義行

王化行字允升積學未售居鄉守正不阿里中子弟有放棄正業者必苦口規誡弗憚煩勞里人德之此次續修邑乘職任採訪自備資斧實事求是邑乘告成化行病故壽七十長子登庸邑庠生次傅之亦循謹士

王松齡字紹文邑庠生通醫學有求診者無不應旋經前邑侯蔣延辦周家口南岸寨工局事宜修築寨垣與同人和衷共濟以

期完善壽六十餘而卒子鴻典鴻鈞能守其業

胡存三字體綱廩貢生熱心興學約集同志在周家口南岸延福寺購地一段各捐已財創建靜遠書院敦請宿儒主講每月課詩文兩次評定甲乙給以膏火之資四方來課者漸眾旋天津黃公杏樵膺商准等處離商僑居周口知存三辦理善迭次捐款後呈明大府又輸銀五千兩充作永遠經費從此廣大規模文人輩出皆存三力也子纘翼廩貢克誘邑庠生

史載筆字記言增生善事親居鄉能和眾教授生徒勤於講解一時向學者樂從之邑南華河一帶常有水患載筆對於築路修橋等公益無不首先提倡以成其事怨勞罔所避焉壽八十二歲而卒

楊向榮字華堂監生性仁慈好行其德鄰人有急難事向榮無不

商水縣志

卷二十四

二

援之光緒宣統時代楊河地方迭遭水患居民苦甚向榮出己穀以賑後沙河決更不聊生向榮破除情面力請費縣尊開倉濟災全活許多向榮家殷富多子延師授學均收實效懷玉廩生如玉璽玉皆庠生壽八十里中人以望重鄉閭等匾懸其門親爲祝嘏者常數百戶可謂榮矣

史鑑字賓筵庠生素以孝友著邑南有漕汾二河每值夏秋霖雨過大不無漫溢鑑與諸鄉善士勸捐貲財兩次築修咸利賴焉邑侯以惠桑梓匾旌之遇族鄰爭訟事力爲排解族鄰感其義訟無不息家居授學多所成就片紙隻字未嘗妄入公門謹飭如此壽六十二子英才歲貢生能紹其業

善舉

善舉亦義行中事故補入義行後

周家口爲豫省巨鎮水陸交衝商賈輻輳煙火萬家有不戒火者

必害及街鄰南岸坊子街衆善士設立救火會亦名太平會已
歷數十年矣富者捐貲貧者出力所製救火諸器皆便捷適用
一聞火警立即鳴鑼往救向不分畛域出力者除汲水外其餘
或持利器升屋截斷不令延燒或執機器吸水猛撲以遏火焰
履危涉險奮不顧身甚而焦頭爛額亦所不避總期盡力撲滅
不使餘灰復然而後止又南岸前張營河西永甯集數年前亦
立有此會辦法彼此略同數會皆實心實力成此善舉不要譽
不望報雖無曲突徙薪之謀實存拯災救難之心且能繼續接
辦有舉莫廢更屬難得較濟人於安常無事之日其功德更大
矣

此與修路會皆義行中事路會利人行火會救人災必質實仁
厚者乃樂爲此路會已採入惜此會採訪員略而弗及補遺時
商水縣志

欲訪明倡立何年主任何人據友人云各會成立歷有年所皆
係輪流分任不聞有專主者因迫於付梓不暇細訪但能補入
邑乘不至泯沒無聞其會傳其人亦傳矣志書局同人謹誌

補遺

列女志

賢母

監生熊同量繼室李氏生子祖繹同量故家道日衰氏率兩前子
鄉居克儉克勤整理農務漸足衣食旋兩前子歿氏恐祖繹因
幼廢學遂攜歸母家嚴加教育俾修儒業祖繹亦善體親心克
自振拔年十五一試入庠祖繹姿聰慧又好讀竟至不祿越數
年氏操勞成疾而終里人惋之

節婦

監生周慶禧妻康氏年十九慶禧歿矢志守節事翁姑以孝聞

補遺

麗藻志

碑記

商水縣志續修碑記

拔貢

李介祐

邑人

古今難成易敗之事必遇此事時心有餘而志不逮志能逮而力不足數者參差其間故事敗易而成難於何徵之徵諸吾邑乘之續修蓋得其大凡矣夫邑乘之爲書也掌故詳其中文獻列其中版圖形勝人情風俗微而至於一草一木莫不備錄於其中生斯土者家置一編常目在之獲益匪淺無如舊本所存自清乾嘉以迄光宣相距百數十年邑中之政治因革里人之言行事爲可法可傳散佚而弗彰者不知其幾鄉先生心每計之未逮其志志有逮焉不足其力續修之舉旋作旋輟所謂難成而易敗者此歟洎商水縣志

卷二十四

五

乎民國 世丈王公煥臣趙公曉峯暨族長者賓閣王公芝香趙公順庵王公惠民諸君子建議進行祐於是得供奔走而效馳驅適 縣長徐公沛棠召集周濱公同提倡基礎未立而升任太邱

傅公伯申受篆伊始先自捐貲並諭邦人士之殷實者次第樂輸得金一千餘爰邀主筆開館編輯移時 傅公亦去 郭公少甫 鈕公右君雖各相助爲理值經費告罄幾廢半途幸 裘公少京來宰吾邑急思續振已墜力爭上游設法籌欸以資接濟十越月篇帙彙齊歲至戊午剞劂工竣又得 宋公蘭蓀功收垂成俾吾邑志書得臻完善爲我

國家備轡軒之採擇爲我鄉里作億禩之典型庶不負賢有司與諸同志之苦衷云